

## ROMAFŃ Paulo Ovoli Kĩ Etsɛɛɛ Ema Romafo

**I** Ovoli kĩa to yĩ, Paulo, Yesu Kristo ɔsumunɛ sekẽ. Baguma lɛpau yĩ, evɛ yĩ kĩa ãyadani ye foto ɔnyanɛ, ndɛ letsã nɛ ye Kalɛ Wĩ a akũ.

**II** Baguma lɛ Kalɛ Wĩ kĩa eyi anɛ kɔkɔɛ etsãmena ye onukpẽ banyɛnɛ akũ, ndɛ ayekĩ betɛɛɛ nɛ Katsɛɛɛ Kpalewa a kame a.

**III** Bɛɛ Kalɛ Wĩ kĩa nɛ Obi, boe ɔlate Yesu Kristo akũ. Bɛma ye ndɛ otidziwa aye nɛ Lɛgã Dawid kasinu a kame.

**IV** Nɛ kakpalɛ nɛ hũhũ kame ni, Baguma nyɛ ye etsa mɔ kɔbẽ ndɛ ye obi, lɔkɔ a kĩa ɛdzɛla ye etomena wuda kame a.

**V** Baguma tsã Yesu Kristo akũ emó boe konya bɔyadani foto banyanɛ, ayekĩ fɔatsã ye dĩ akũ, bɔakpã fude fude bati flee betɛ ye bido, bitɛ ye.

**VI** Mi Romafo lɛmɛ, midɛĩ nɛ bati a kĩa Baguma vɛ kĩa bɛyaakɛna Yesu Kristo bade a kame.

**VII** Ade foesũ ntsɛɛɛ ovoli kĩa mama mi flee a kĩa midɛĩ nɛ Roma, kĩa Baguma awɛ mi kalɛ, ade evɛ mi kĩa miyaakɛna bati kĩa ɛkpale be akũ a.

Baguma boe ɔlɛga mɔ boe ɔlate Yesu Kristo, bɛmɔ mi konya, bɛkpa mi lukudɔ lɛmɛ!

### *Paulo Nyɛ Baguma Kɔɛ.*

**VIII** Letsa a kĩa lenyaa lɔtɔ nyɛ kĩa, nkɔa Yesu Kristo manyɛ yĩ Baguma kɔɛ nɛ mi flee lolɔ, kitonɛkĩ balɛ ayekĩ mite Kristo mido a fɔletsã nɛ katinya kame flee.

**IX** Baguma a kī masum mọ yī ɔwɔle flee, ne letsā a kī made ne ye Obi Kale Wī a akū a, nye yī adansie kī letsa a kī male a nye ɔnɔkoali. Baguma nyina kī mate ane ne mi akū,

**X** loko nye loko kī maboa mpaε. Mawā Baguma kī nte fonye ye kawε ni, ekpa yī osi iyaasela mi finyaa.

**XI** Kitonekī mawε mọ ɔsī mọ ɔsī kī bomo akū, loko nkɔa hūhū kame futetsa fudi mma mi nkɔa ndo mi kobē.

**XII** Letsa a kī matsa nye kī bomo mi bóado akū kobē. Yī katekado ado mi kobē, ade mi kade leme aado yī kobē a.

**XIII** Nwaē amε, mawε kī minyi kī nkɛna nhihie loko pii kī mayaasela mi kufe, leme loko nye loko litsedi asua yī osi. Mawε kī mana bati kī betε Kristo bido ne mi kame, ndε ayekī nna ne bati bebā a kī benyé Yudafọ a kame a.

**XIV** Kitonekī yī adzuma fɔane kī nde letsā nkpa bati flee, bikī binyina kadi mọ bikī binyína kadi, bati kī binyina tuvoli mọ bikī binyína tuvoli.

**XV** Ade foesū akū asī yī kī made letsā ne Kale Wī a akū nkpa mi a kī mideī ne Roma leme a.

### *Kale Wī a Deī Kobē.*

**XVI** Kale Wī a láko yī konyɔā, kitonekī Baguma kobē koane. Kakpa bati a kī betε ke bido a nkpā, Yudafọ nyaa loto fomo bikī benyé Yudafọ a.

**XVII** Kitonekī Kale Wī a kame banye ayekī Baguma abu bati kī bekpola a katsa. Fonye katekado foletsa kīto kayokayi kenawo kawūna. Nde ayekī betsele ne Katsεle Kpalewa a kame kī, “Oti kī Baguma abu kī yadā kpīi ne ye katekado sū ni, yaana nkpā.”

*Odima Leny  Oti Kp  N  Baguma An .*

**XVIII** Baguma anye ye kalokpa katomena ode kako ne bati a k  bakwa tokpa mo ablo fotsa kasua onokwali a kanyi osi a ak .

**XX** Baguma avele bati a soto kitoneki binyina fotsa a k  otidziwa aapuli enyi ne ye ak  a. Baguma moawe a lenye foe etsa be yededeede.

**XX** Kito ane k  Baguma boa katinya a, ye kuitise k  baamo mo ane a, mo kob  k  kudei daa mo ye Baguma kutidu a, anye foe ak  katsa ne fotsa a k  ebwa a kame. Foesu bati a lel apuli benye onukpe k  binyina Baguma.

**XXI** Tito k  binyina Baguma malo ni, baakpa ye obu a k  efeta ye, ade baanye ye kole a. Mbom fotsa a k  fol  nfaso ak  bakona, ade be adzuni kame ke otu a.

**XXII** Babu be ak  k  binyina kadi, leme bedani badzimbifo.

**XXIII** Ne k  bekoa obu bekpa Baguma a k  edzi nkp  daa a ni, basum fotsa a k  beme mo awe kutidu, k  fol  nde oti k  yaku, iye konolabi, iye bayae, iye bayae k  baboli ne seme ak .

**XXIV** Ne foesu Baguma fone be awe k  bekena effi fotsa k  be towole awe a, k  bekoa be sukena bakena fonyoatsa mo be ak  ak .

**XXV** Bakwa Baguma ak  onokwali a kavemena mo fov . Basum fotsa a k  Baguma boa a kaba Baguma moawe a k  ebwa foe a, k  kefeta k  bekaamu daa a! Foya lom .

**XXVI** Ne fuki bakena a su, Baguma fone be awe ekpa sukena fowetsa k  foado ak  konyoa kakena. Be batsole dani bawamo bakoba batsole.

**XXVII** Ade ayea banyole lẹmε f̄õ bεm̄o batsole kawa ndε ayekĩ Baguma kεna eyi a, mbom bak̄oba banyole ak̄o be odo. Foesũ banyole awam̄o akũ kĩ k̄onyoã lɛl̄aa foe kamε. Nε ɔbla kpa kĩ beb̄oα k̄ĩ sũ ni, Baguma vεlε be s̄oto a kĩ sɛfeta be a, nε be m̄oawε kamε.

**XXVIII** Ayekĩ bati a s̄ĩ kĩ baáte kadikanyi w̄ĩ nε Baguma akũ a bido nε be kamε sũ ni, Baguma f̄onε be awε ekpa be adzuni kĩ bibula kade a, kĩ bεkεna f̄otsa a kĩ f̄otáfeta a.

**XXIX** Be kamε yi m̄o t̄okpa tidi nyε tidi kakεna, ablo, anengb̄a m̄o bati t̄okpa kawε. F̄obeb̄a kĩ fudeĩ nε be kamε nyε lineke kan̄o, awudi, lεma kavũ, bati kake m̄o likesĩ. Fukĩ fubu nyε kĩ bale bati akũ kodzela,

**XXX** benyε bati buĩ banyεnε, m̄o Baguma bakesĩnε. Benyε bati bav̄ūnanε, akũ batanε, akũ bapianε, bawε t̄okpa tisi beb̄a pii kayamεna m̄o bati k̄ĩ baábu be bamanε a.

**XXXI** Benyε bati k̄ĩ be t̄ow̄olε l̄ako be k̄oto, baákεna nε b̄ohε a akũ a, belá semε kale ade baám̄o oti k̄onya a.

**XXXII** Tit̄o k̄ĩ binyina pefee k̄ĩ nε Baguma mbla a onukp̄ε ni, bikĩ bidzi nkp̄ã nε osi k̄ĩ odu akũ a feta bεkpa wuda malo ni, bεkakεna foe. Nnέ foe odi bakεna, mbom bεdza nε bikĩ bakεna f̄otsa kpa k̄ĩ odu a liti.

## II

### *Baguma Adzεm̄o Bati Flee.*

<sup>1</sup> Nwaě, n̄o ak̄o bati beb̄a k̄oto? Nte litsa oti anε malo ɔláapuli ɔnyε onukp̄ε k̄ĩ n̄o k̄õ oti kp̄ĩ anε. Kitonεk̄ĩ nte adzεm̄o bati beb̄a adeke akεna lεtsa

mɔape a kī de bakena a ni, nɔ mɔawe akū ako kɔtɔ.

II Bunyina kī Baguma deī ɔtɔbe nte edzemo bati a kī bakena fɔtsa kīi bame a.

III Leme nwaē, nɔ a kī akena fɔtsa kīi bame a leme ako bati bebā kɔtɔ ne foe akū a ni, abu kī aapuli olo Baguma kɔtɔkako?

IV Mbɔee ɔbɔe foe kī Baguma deī seme kale, ɔwɔle kado mɔ ɔwɔle bɔee sū ɔtséla letsama? Onyina kī nuwī Baguma deī seme kale, kitonekī yawe kī yakpā nɔ ɔdani ɔwɔle kame.

V Leme ne nɔ ato ɔsī kī aádani ɔwɔle kame sū ni, ɔfɔ nɔ sɔtɔ kavele aana ɔsē ne luwi a kī Baguma aanye ye kalokpa mɔ ye fɔletsa kadze kpīi akū a kanya.

VI Kitonekī Baguma aase odi nye odi kɔtɔ ne ye adzuma a kī ekena a onukpē.

VII Bati a kī bakena tuwī kī bawe kukūkpale, obu mɔ daa nkpā a, Baguma aakpa be nkpā kī elá kawūna a.

VIII Leme bati bebā a kī be odi fude bawe, kī bisī ɔnokɔali a, bitomo tɔkpa a, Baguma aakpa kalokpa ewele be sɔtɔ mɔ ɔsī mɔ ɔsī.

IX Bati flee a kī bakena tɔkpa a, aamo lubo mɔ kalɔe, Yudafɔ aanya lotɔ, ke liti bikī benyé Yudafɔ a leme.

X Leme Baguma aakpa bikī bakena tuwī a kukūkpale, obu mɔ lukudo, Yudafɔ aanya lotɔ bena, fɔmo bikī benyé Yudafɔ a leme.

XI Kitonekī Baguma ládā oti ane ne ye fɔletsa kadze kame.

XII Bikī benyé Yudafɔ a tána Mose mbla a, leme kī bekena titikpa ni, Baguma aavele be sɔtɔ, kī eláakpa mbla a bedzemo be. Yudafɔ a na Mose

mbla a, lɛmɛ bɛkɛna titikpa, Baguma aakɔa mbla a ɛdze mɔ be.

**XIII** Kitonɛkĩ nné bati a kĩ batse mbla a nyɛ bati kpĩ nɛ Baguma anɛ, mbom bati a kĩ bɛkɛna nɛ mbla akũ a, adã kpĩ.

**XIV** Nɛ ɔnokɔali kame ni, bikĩ bɛnyé Yudafo a tána mbla a, lɛmɛ nte oti kabɔa kame fĩ bɛkɛna letsa a kĩ Mose mbla tsa ni, fɔatsa kĩ bɛkɛna mbla bɛkpa be akũ, tito kĩ belá Mose mbla a malo.

**XV** Be fɔkɛlatsa atsa kĩ Baguma tsɛle mbla a nɛ be tɔwɔle kame. Be tɔwɔle lɛmɛ atsa kĩ fɔnye ɔnokɔali, kitonɛkĩ fɔko fudi be tɔwɔle ako be kɔto ade yadza nɛ be liti a.

**XVI** Nɛ foesũ nɛ Kale Wĩ a kĩ male a onukpẽ ni, ade aye fɔana nɛ Luwi a akũ kĩ Baguma aatsã Yesu Kristo akũ ɛdzemɔ bati flee fɔlo kame fɔletsã kolawa a.

### *Letsa a Kĩ Mose Mbla a Lɛ Nɛ Yudafo Akũ.*

**XVII** Ave nɔ akũ kĩ Yudani, akɔa anɛ kate nɛ mbla akũ, ade apia nɛ Baguma akũ a.

**XVIII** Onyina letsa a kĩ Baguma awɛ kĩ kɛna, ade ɔkɔle otomɛna mbla a kame letsa a kĩ lenyɛ fɔtsa wĩ a.

**XIX** Ate kado kĩ ɔnye banɛkune ɔkpãne, ɔnye ɔhaĩ ɔkpa bikĩ bideĩ nɛ ɔtũ kame a.

**XX** ɔkɔa nɔ akũ ɔkɛna bakɔasia ɔvelɛne mɔ bikĩ bɛtábo anɛ tɔ fɔtsa ɔtsanɛ. Onyina yededeede lɛmɛ kĩ kadikanyi mɔ ɔnokɔali deĩ nɛ mbla a kame.

**XXI** Nɔ a kĩ atsa bati bebã fɔtsa a, nde sũ aátsa nɔ mɔawe akũ? Ade letsã kĩ bati betaye, lɛmɛ nɔ mɔawe a aáye?

XXII Abi bati kī betaboa adopaa, leme no moawe a aáboa adopaa? Aáwe baviõ foletsa, leme aáye kuyiõla kame fotsa?

XXIII Abo owole ne Baguma mbla a akū, leme afum ye mbla a kakoado Baguma konyoã.

XXIV Katsela Kpalewa a le kī, “Mi Yudafõ obla kpa sū bikī benyé Yudafõ a ale foletsa kpa ne Baguma dī akū.”

XXV Nte akena ne mbla a akū ni, kekõ no lekpati katsua a akū deĩ nfasõ, leme nte aákena ne mbla a akū kõ ni, oketimo bikī betátsua fõkpati a.

XXVI Nte oti kī enyé Yudani, kī etátsua lekpati akena ne mbla a akū ni, Baguma leláabu ye nde oti kī etsua lekpati aye?

XXVII Foesū, mi Yudafõ, oti kī enyé Yudani a kī ekena ne mbla a akū aako mi koto, kitonekī miafum mbla a, tito kī betsele ye biyi bekpa mi, ade miatsua lekpati a.

XXVIII Nné oti kī bema Yudani ñye oti kī bitsua lekpati ne Mose mbla a onukpẽ nye Yudani. Ade lekpati katsua paa ni, fõdzé fõkpa sukena katsua lekenana kī bamõ ne oti akū a,

XXIX mbom Yudani kpanunuunu nye oti kī enye Yudani ne ye kamekame, ade foe nye kī bitsua ye owole kame lekpati. Lekpati katsua kīĩ nye Baguma Hūhū adzuma, fotáto mbla a kī betsele biyi a kame. Baguma amu oti kīĩ odu, nné batidziwa.

### III

<sup>1</sup> Litsa koũ Yudani deĩ ebẽ oti kī enyé Yudani, ñye litsa nfasõ deĩ ne lekpati katsua kame?

II Onokoali nfaso a pone ne tisi pii akū. Katonyade nye kī Yudafo awe Baguma koa ye foletsa a edo.

III Leme nde nte be kame badi tate bido a? Katsa foatsa kī be katatekado aafō Baguma lelāadi onokoali?

IV Oowo! Kene kī Baguma adi onokoali, tito kī oti nye oti ama fovā malo, nde ayekī Katsese Kpalewa a le kī,

“Nte ole kodzela ni, no foletsa fonya onokoali.

Nte bedzemo no ni, aanya akū.”

V Leme nte boe titikpa kakena anye fotsa wī a kī Baguma akena a katsa yededeede a ni, bōapuli bole kī Baguma akena tokpa nte evele boe soto? Ade kavia kī otidziwa aavia a.

VI Oowo! Nte Baguma lādā kpī ni, nde yaakena edzemo katinya kame?

VII Nte yī fovā kama anye Baguma onokoali a katsa, kī bamu ye a, nde sū bako yī koto nde tokpa okenane?

VIII Nde sū bōále kī, “Mifō bokena titikpa ayekī tuwī aane tito foe kame?” Onokoali bati badi lamena fovā kama kate ne yī akū kī ade aye nle a. Baguma aako be koto nde ayekī kefeta.

### *Odima Lenyé Oti Kpī.*

IX Mbōee finyaa, boe Yudafo kadzi kame nene kebē bikī benye Yudafo a? Oowo! Kitonekī ĩnya loto ntsa kōkōe kī tokpa nya Yudafo mo bikī benyé Yudafo a flee akū,

X nde ayekī Katsese Kpalewa a le kī,  
“Oti odima lelāa kī yadā kpī. Midi oti moape malo lelāa.

XI Odima lelāa kī yanu foletsa kayo,



ĩye kĩ yawe Baguma liti osi.

**XII** Bati flee muniki ne Baguma liti,  
be flee beyela osi,  
ade odima leláa kĩ yakena tuwĩ a,  
oti mɔape malo leláa.

**XIII** Be tudomena binya tɔwaa  
nde linike kĩ lewaa luto aye,  
bake bati menemene mɔ be fɔme.  
Be onukpẽ kame fɔlets a la nde kɔe kadõ aye.

**XIV** Fudumutsa mɔ fɔlɔewotsa yi be tunukpẽ  
kame.

**XV** Bawe sɔwa kĩ bapila bati beko be.

**XVI** Kaka nye kaka kĩ banaa ni, kawɔla mɔ  
fɔtsa kade kabula ate ne liti.

**XVII** Binyina kadzi ne lukudo kame,

**XVIII** ade Baguma kavila kadima leláa be  
kame a.”

**XIX** Finyaa, bunyina kĩ lets a nye lets a ne mbla  
a kame a atamo bikĩ bideĩ ne mbla a kayɔ,  
ayekĩ baasua batidziwa onukpẽ kanye osi, lokɔa  
Baguma ledzemɔ katinya kame flee.

**XX** Kitonekĩ odima lenyé oti kpĩ ne Baguma  
ane, ne ayekĩ yakena ne mbla a akũ sũ. Lets a  
a kĩ mbla a akena nye kĩ yafõ oti anyi kĩ ekena  
tokpa.

*Lets a Kĩ Lefõ Bɔkpɔla Ne Baguma Ane.*

**XXI** Leme finyaa, benye osi a kĩ Baguma atsã  
kakena bati kpĩ ne ye ane a betsa. Fukĩ letséla  
mbla a akũ, tito kĩ Mose mbla a mɔ Baguma  
onukpẽ banyene di foe akũ adansie malo.

**XXII** Baguma akena bati badã kpĩ katsãmena be  
Yesu Kristo katekado kame. Yakena fukĩ kakpa

bati a kī bete Kristo bido a flee, kī ntsitsemu adima leláa foe kame.

**XXIII** Kitonekī odi nye odi kena tokpa, ade edeĩ mo lugo ne Baguma kukũkpale a owẽ a.

**XXIV** Leme ne konya a kī Baguma amo faa sũ ni, etsã Kristo Yesu a kī ese koto ne boe loló a akũ, ekena boe bati kpĩ.

**XXV** Baguma kɔa ye ekpa nde lema okplane kī fotsã ye wuda kame bati bena tokpa kakokate nte bete ye bido. Baguma kena fukĩ enee yatsa kī yadã kpĩ. Ne kokoe a, Baguma na owole boee, eve sinapo esua bati tokpa,

**XXVI** leme finyaa kō yate ane ne be tokpa akũ ekɔa yatsa kī yadã kpĩ. Ne osi kī akũ, Baguma atsa kī ye moawe enye oti kpĩ ade yakena odi nye odi kī ete Yesu edo oti kpĩ a.

**XXVII** Finyaa ni, litsa bóakɔa bubo owole? Bolá letsamama! Mo litsa sũ? Ayekī boakena ne mbla a akũ sũ mbóee? Oowo! Mbom ayekī bote budo sũ.

**XXVIII** Foesũ bóawũna kī katekado odi akũ fotsã mo oti adã kpĩ ne Baguma ane, kī nné mbla a akũ kakena sũ.

**XXIX** Mbóee Baguma a ni, Yudafó odi ode yané? Nné bikī benyé Yudafó a leme Baguma yané? Oo, be malo Baguma yané!

**XXX** Baguma moape deĩ, ade yaakena Yudafó bati kpĩ etsãmena be katekado akũ a, ekena bikī benyé Yudafó a leme bati kpĩ etsãmena be katekado kame.

**XXXI** Katsa fotsa kī katekado sũ bofone mbla a awe? Oowo! Folá lomo kolaa, mbom bupini mbla a mo osĩ mo osĩ.

## IV

*Abraham Kadzi Kpĩ Nye Katekado Nfaso Ketsa.*

<sup>I</sup> Litsa bóapuli bóle ne boe kade ɔwanyo Abraham akũ? Litsa emó eyi ɔsũ ne foletsa kĩ akũ?

<sup>II</sup> Nte tudzuma a kĩ ekena a akũ fotsã sũ Baguma bu Abraham kĩ enye oti kpĩ ni, kekõ yaana litsedi kĩ yakoa ebo ɔwole, leme nné ne Baguma ane.

<sup>III</sup> Kitonekĩ Katsela Kpalawa a le kĩ, “Abraham te Baguma edo, ade ne ye katekado sũ Baguma te ye kĩ yadã kpĩ.”

<sup>IV</sup> Oti kĩ yakena adzuma ni, base ye koto, leme baábu kotokase a nde futetsa, mbom fonye letsa a kĩ fofeta fokpa ye adzuma a kĩ ekena a.

<sup>V</sup> Leme nte odi táte dĩ ne adzuma kakena kame, mo ete edo kĩ Baguma akena bikĩ baávila ye bati kpĩ ni, ne ye katekado sũ Baguma aabu ye kĩ enye oti kpĩ.

<sup>VI</sup> Ade foe Legã Dawid leme le kĩ bihila oti a kĩ Baguma bu ye kĩ enye oti kpĩ, kĩ nné ye adzuma wĩ a kĩ ekena a sũ. Dawid le kĩ,

<sup>VII</sup> “Baguma hila bikĩ ye moawe  
ekoa be tokpa ete be a,  
bikĩ ekoa be titikpa ekola.

<sup>VIII</sup> Baguma hila oti a  
kĩ Baguma nye ane ne ye tokpa akũ.”

<sup>IX</sup> Nhila foletsa a kĩ Dawid le ne awĩ a ni, bikĩ bitsua fokpati a odi fude yane, mbɔee kĩ mo bikĩ betátsua fokpati a? Oowo! Enye bikĩ betátsua fokpati a leme ade, kitonekĩ bóle butomena Katsela Kpalawa a kame kĩ, “Ne Abraham katekado sũ, Baguma bu ye oti kpĩ.”

X Loko lowɔdabe Baguma bu ye oti kpɔ̃? Ne loko a kɔ̃ bitsua Abraham lekpati a, mbɔɛ loko a kɔ̃ betátsua de tɔ̃ a? Fonye loko a kɔ̃ etátsua tɔ̃ lekpati a, nné loko a kɔ̃ etsua liti a.

XI Ke liti kolaa fomɔ bitsua Abraham lekpati. Ye lekpati katsua lɛmɛ nye nsentseleni kɔ̃ Baguma tɛ ye kɔ̃ enye oti kpɔ̃ ne ye katekado sũ, tito kɔ̃ ne loko a na kame malo betátsua tɔ̃ ye lekpati. Foesũ Abraham yadani bati a kɔ̃ betɛ Baguma bido a flee hũhũ kame ɔlega. Tito kɔ̃ betátsua fokpati malo ni, betɛ be ndɛ bati kpɔ̃.

XII Ade ayea Abraham nye bikɔ̃ bitsua fokpati a lɛmɛ ɔlega a. Lɛmɛ nné ne ayekɔ̃ bitsua be fokpati a odi sũ, mbom ne ayekɔ̃ bidzi nkpã ne katekado kame ndɛ ayekɔ̃ boe ɔlega Abraham dzi fomɔ bitsua ye lekpati a sũ.

### *Baguma Kpa Abraham Bɔhe.*

XIII Baguma kpa Abraham mɔ ye kasinu kame babi bɔhe kɔ̃ katinya kɔ̃ kame aanya be adzapadiɛ. Ekɛna foe nné ne ayekɔ̃ Abraham kɛna ne mbla a akũ sũ, mbom ne ayekɔ̃ etɛ edo kɔ̃ Baguma bu ye oti kpɔ̃ sũ.

XIV Kitonɛkɔ̃ ntɛ bikɔ̃ bakɛna ne mbla a akũ odi aanya fotsa a kɔ̃ ɛlɛ eyi a ni, kekɔ̃ katekado lenyé letsama ade Baguma kalekayi a lɛmɛ nye fotsa pupulidza a.

XV Mbla a avele Baguma kalɔkpa kayamɛna, lɛmɛ awã kɔ̃ mbla lelãa ni, mbla kafum lelãa.

XVI Foesũ bɔhe a dzɛ ne katekado akũ, ayekɔ̃ bɔhe a aatim ndɛ fotsa a kɔ̃ Baguma mɔ konya ekɔa etɛ Abraham kasinu a kame babi. Nné bikɔ̃ bakɛna ne mbla a akũ odi fɔwaa fokpa, mbom

mọ bikĩ bete bido nde ayekĩ Abraham te edo a, kitonekĩ Abraham nye boe flee hũhũ kame ọlega,

**XVII** nde ayekĩ Katsela Kpalawa a le kĩ, “Nkwa nọ nkena fude fude pii ọlega.” Foesũ bọhe a nene ne Baguma ane. Ade ye nye Baguma a kĩ Abraham te edo kĩ yadzela banokpa bayidza kadzi nkpā, kĩ yafō fotsa a kĩ foláa kọkọe fọane katinya.

**XVIII** Tito kĩ ane kate adima buki eláa malo ni, Abraham te edo ekadā ane, ade foesũ ekena fude pii ọlega, nde ayekĩ Baguma bi ye a kĩ, “Nọ babi mọ bawa aama besa beblebee nde fusibii aye.”

**XIX** Ne loko a, Abraham te nde futeli oha, leme ye katekado onukpē tádọ, tito kĩ emọ eyi osũ kĩ kọbē woli ne ye sukena kame, mọ ayekĩ Sara leme tē koma kana malo a.

**XX** Etáte fotsa a kĩ Baguma le eyi kĩ yaakena ekpa ye a akũ atsindze, ade etáfone ye katekado awe a, mbom ye katekado a do ye kọbē, edo Baguma obu.

**XXI** Ete edo pipipi kĩ Baguma aapuli ekena ne letsa a kĩ ele eyi a akũ.

**XXII** Ade Abraham katekado sũ mọ Baguma bu ye kĩ enye oti kpĩ a.

**XXIII** Fọletsa a kĩ bele kĩ, “Baguma bu ye kĩ yadā kpĩ” a, nné Abraham odi sũ betsele foe,

**XXIV** mbom betsele foe bekpa boe leme. Boe a kĩ bóate oti a kĩ edzela boe Ọlate Yesu etomona kanokpa a budo a, baabu boe kĩ bonye bati kpĩ.

**XXV** Boe titikpa sũ Baguma fone Kristo awe ekpa kĩ beko, ade edzela ye edzi nkpā, ayekĩ yaabu boe bati kpĩ.

## V

### *Baguma Bu Boe Bati Kpĩ.*

<sup>I</sup> Finyaa, kĩ Baguma bu boe bati kpĩ ne boe katekado sũ ni, bŏtsẽ boe ɔlate Yesu Kristo akũ bŏna lukudŏ ne bŏmŏ Baguma kayite.

<sup>II</sup> Ye akũ leme bŏtsã mŏ osi binya ekpa boe kĩ Baguma aamŏ boe kŏnya, budzi ne ye kŏnyakamŏ a kame. Ne foesũ bŏapia ne kŏnete a kĩ budeĩ kĩ bŏana tsefã ne Baguma kukũkpale a kame.

<sup>III</sup> Ne ōhau pii kame malo bŏamŏ kawŏle, kitonekĩ bunyina kĩ ōhau afŏ bŏakŏle ōwŏle kado,

<sup>IV</sup> ōwŏle kado afŏ bŏadza pintii, ade kadza pintii afŏ bŏana kŏnete a.

<sup>V</sup> Ade kŏnete lãfŏ kŏnyŏã awo boe, kitonekĩ Baguma kŏa ye ōdŏ edo ne boe tŏwŏle kame etsãmena ye Hũhũ Kpalewa a kĩ ekpa boe a akũ.

<sup>VI</sup> Kitonekĩ kĩ bubuki bolã kŏbẽ kudima a, ade lŏkŏ a na kame Kristo ku ne tŏkpa bakenane lŏlŏ, nde ayekĩ Baguma mŏawe yi ekpa a.

<sup>VII</sup> Fŏnye letsã mŏ ōsĩ kĩ oti odi aku ne oti kpĩ lŏlŏ. Fŏapulĩ fŏya malo kĩ oti odi aado ōwŏle kĩ yaku ne oti wĩ lŏlŏ.

<sup>VIII</sup> Leme Baguma tsa boe ayekĩ eti yawe boe kale, kitonekĩ lŏkŏ a kĩ bubuki bŏnye tŏkpa bakenane a, Kristo ku ne boe lŏlŏ.

<sup>IX</sup> Etsã ye wuda kame ekena bati boe kpĩ ne Baguma ane. Wuda kĩ sũ yaanye boe etomena Baguma kalŏkpa a kame.

<sup>X</sup> Bonya Baguma bakesĩne leme ekena boe ye bakŏba etsãmena ye Obi wuda a kĩ ekŏa epata ye

a kame. Finyaa kī ekpola Baguma ekpa boe kīi ni, yaate boe eba, kitonekī edzi nkpā.

**XI** Leme nné fukīi odi, mbom bōamō kawole ne letsa a kī Baguma tsā boe ɔlate Yesu Kristo akū elola bōmō ye kayite a sū.

*Ntsitsemu a Kī Edeī Ne Adam Mō Kristo Kayite a.*

**XII** Tōkpa tsā oti mōa akū tēya ne katinya kame, ade wuda tsā ye akū eya a. Ne fukīi sū ni, wuda yale ewo ne batidziwa flee kame, kitonekī odi nye odi kena tōkpa.

**XIII** Ne ɔnokɔali kame ni, tōkpa na ne katinya kame fōmō mbla a ya, leme awā kī mbla lelāa ni, baábu letsama kī lenye tōkpa.

**XIV** Leme kito Adam loko keyawo Mose loko a ni, wuda nya batidziwa flee akū, mō bikī betákēna tōkpa nde tikī Adam kena a malo. Adam kīi dzē nde oti a kī yaaya a.

**XV** Leme be bati nviā a betáketi, kitonekī Baguma futetsa faa a lelá nde Adam tōkpa a. Fonye ɔnokɔali kī bati pii ku ne oti mōa tōkpa sū. Leme Baguma konyakamō bē kolaa, foesū ade ayea ye futetsa a kī yakpa bati pii faa katsāmena oti mōa kī enye Yesu Kristo akū a la a.

**XVI** Futesa a kī Baguma kpa faa a lelá nde letsa a kī oti mōa tōkpa vele tēyāmena a, kitonekī tōkpa a kī oti mōa a kena a yamō kadze mō kɔtɔkaku. Leme futetsa a kī Baguma kpa faa a fō bibu bati beblebee tōkpa a kī bekēna a kī badā kpīi.

**XVII** Fonye ɔnokɔali kī oti mōa tōkpa a kī ekēna sū wuda yaanya akū. Leme letsa a kī oti mōa a kī enye Yesu Kristo kena a bē foe flee. Bikī bēna Baguma konyakamō baū kīi flee a, kī ekēna

be bati kpĩ lεmε a, aanya akũ ne nkpã kame βetsãmεna Kristo akũ.

**XVIII** Foesũ ndε ayekĩ oti mɔa tɔkpa a kĩ ekεna fĩ βεkɔ batidziwa flee kɔtɔ a, ade ayea oti mɔa tuwĩ kĩ ekεna a kpa batidziwa flee ɔtɔβε, βεna nkpã lεmε a.

**XIX** Ade ndε ayekĩ oti mɔa atɔ ɔsĩ kakεna fĩ bati flee dani tɔkpa bakεnanε a ni, ade ayea oti mɔa Baguma ɔlεdo akũ kakεna aafɔ βεkεna bati pii kpĩ ne Baguma anε a.

**XX** Bεyamεna mbla a ayekĩ tɔkpa kakεna aapɔ ebu, lεmε awã kĩ tɔkpa kakεna pɔnε ni, Baguma kɔnyakamɔ lεmε apɔ kabu.

**XXI** Foesũ ayekĩ tɔkpa nya akũ ne wuda kame a ni, ade ayea Baguma kɔnyakamɔ anya akũ katsãmεna kadzi kpĩ kame, kakpã boε ka-womεna nkpã a kĩ kelá kawũna a kame, ne boε ɔlate Yesu Kristo dĩ akũ a.

## VI

### *Budzi Nkpã Ne Kristo Sũ.*

**I** Foesũ, finyaa litsa bɔalε? Bɔana ne tɔkpa kakεna kame ayekĩ Baguma kɔnyakamɔ aapɔ kibu mbɔεε?

**II** Oowo! Kĩ buku bɔkpa tɔkpa kɔkɔε a, ndε bɔabuki budzi nkpã bɔkakεna tɔkpa?

**III** Mbɔεε minyĩna kĩ, kĩ βεwɔla boε mui, bɔkεna ɔmɔa mɔ Yesu Kristo a, βεwɔla boε mui bɔkεna ɔmɔa mɔ ye wuda a lεmε?

**IV** Ne boε mui kawɔla kĩĩ kame a, bɔna tsefã ne ye wuda a kame, ade bibila bɔmɔ ye a. Nde ayekĩ ɔlεga a tsã ye kukũkpale kɔbẽ kame εdzela



Kristo etomena banokpa kame a, ade aye boe malo bóayidza budzi nkpã vɔẽ a.

V Kitonekĩ ayekĩ bókena omɔa mɔ ye ne ye wuda kame a, ade ayea bóabuki bókena omɔa mɔ ye ne boe kadzela kadzi nkpã kame nde ayekĩ bedzela ye a.

VI Bunyina kī, kī bebɔa boe kutitse kɔe a ne asendua akū mɔ Kristo ayekĩ boe sukena kī sawe tokpa kakena a aawɔ, ayekĩ boláabuki bɔnya tokpa basate.

VII Kitonekĩ nte oti sila eku ni, benye ye ne tokpa kobẽ kayɔ.

VIII Nte buku mɔ Kristo ni, bɔte budo kī bóadzi nkpã lemɛ mɔ ye.

IX Bunyina kī, kī Baguma dzela Kristo etomena kanokpa sū ni, eláabuki eku da. Wuda buki leláabuki ena kobẽ kudima ne ye akū.

X Wuda a kī Kristo ku a, eku ye deedimɔape ekpa tokpa, lemɛ nkpã a kī edzi finyaa, edzi ye ekpa Baguma.

XI Ade ayea mi malo mibu mi akū kī miku mikpa tokpa, lemɛ Baguma ne omɔa kakena mɔ Kristo Yesu kame.

XII Ketáne kī tokpa tibuki tenya mi sukena a kī saku a akū, ayekĩ míakakena ne se fowetsa akū.

XIII Mitafɔne mi sukena kakɔma awe mikpa tokpa tekɔa tekena ablo adima, mbom mikɔa mi akū mikpa Baguma nde bati kī enye etomena wuda kame eyamena ne nkpã kame. Mifɔne mi akū flee awe mikpa Baguma fɔnya fɔtsa kī yaakɔa ekena tuwĩ.

XIV Ketáne kī tókpa tenya mi akū, kitonekī miláa mbla kayo, mbom mideĩ ne Baguma konyakamo kayo.

*Tuwĩ Kakena Basate Miane.*

XV Foesũ litsa boale? Bóakena tókpa kitonekī boláa mbla kayo, mbom budeĩ ne Baguma konyakamo kayo sũ? Oowo!

XVI Minyina pefee kī nte mikoa mi akū mikena odi basumune ni, minye olate a kī ye kayo mideĩ a basate. Nte mikoa akū mikpa tókpa kakena ni, letsa a kī laane ne foe kame nye wuda, leme nte mikena ne Baguma oledo akū ni, foe nfaso nye kadzi kpĩ ne Baguma ane.

XVII Boanye Baguma kole paa, kitonekī tito kī minya tókpa basate miyatẽ malo ni, finyaa mite onkokoali fotsa katsa a mo mi towole, milamo foe akū kakena peperepe.

XVIII Baguma nye mi etomena tókpa kame, midani fotsa wĩ kakena basate.

XIX Male kodzela nde otidziwa aye ne ayekĩ otidziwa ado ne sukena kame sũ. Ne loko lidi kī letẽ kame ni, mifone mi akū flee awe nde basate mikpa effĩ mo ablo fotsa kakena. Ade ayea kene kī finyaa miafone mi akū flee awe mikpa nde tuwĩ kakena basate a.

XX Kĩ minya tókpa kakena basate a, tuwĩ kakena tánya ohe fókpa mi.

XXI Litsa nfaso mina mitomona fotsa a kī mikakena a kī finyaa foako mi konyoã a kame? Fotsa a na bame flee kawũna nye wuda.

XXII Leme finyaa, Baguma nye mi ne tókpa kame midani ye basate. Nfaso a kī míana nye kī miakoa mi akū flee mikpa Baguma ekpale

ye akũ, lokoã ne foe kawũna mina nkpã kĩ elá kawũna a.

**XXIII** Kitonekĩ tokpa kotokase nye wuda, leme Baguma futetsa faa nye nkpã kĩ elá kawũna a, ne omoa kakena mo boe Olate Kristo Yesu kame.

## VII

### *Nfantuhũ Kĩ Eto Kotsõ Kakõã Kame.*

**I** Nwaẽ ame, mi a kĩ minyina Mose mbla a, mianu letsa a kĩ mawe kĩ male ne awĩ a kayo. Mbla anya oti akũ ne loko a kĩ edzi nkpã a odi.

**II** Foe nfantuhũ nye kĩ mbla sui otsole kĩ edzi konyo edo ne onyo kayo ne onyole a nkpã kame. Leme nte onyole a ku ni, otsole a né ne mbla a kĩ esui ye emena mo onyole a kame.

**III** Foesũ nte otsole a naa onyole bebã sekẽ ne loko a kĩ onyo a buki edzi nkpã ni, baave ye odopani. Leme nte onyo a ku kõ ni, mbla kĩ tásui ye, ade nte enadzi mo onyole bebã ni, etáboa adopaa.

**IV** Nwaẽ ame, ade aye fola fokpa mi malo a. Ne mbla a onukpẽ ni, mi malo miku, kitonekĩ minye Kristo sukena a seke sisi. Ade finyaa minye ye a kĩ Baguma dzela etomena kanokpa a bade, ayekĩ bóane libi bokpa Baguma.

**V** Kitonekĩ kĩ budzi nkpã ne sukena kame a ni, sukena fowetsa kpa a kĩ mbla a dzela ne boe kame a, kena adzuma ne boe kame, emane boe ekpa wuda.

**VI** Leme finyaa boné ne mbla a kayo, kitonekĩ buku bokpa fotsa a kĩ fusuli boe nde kola bawane a. Boláabuki busum ne mbla kĩ betsele oši koe a akũ, mbom bóasum ne Hũhũ kame osi voẽ a akũ.

*Mbla Afɔ̃ Oti Akena Tɔkpa.*

<sup>VII</sup> Finyaa litsa bóale? Kale bóale kǐ mbla nye tɔkpa? Oowo! Fɔlá lɔmɔ. Leme mbla a lefɔ̃ ñnyi letsa a kǐ tɔkpa ane. Nte mbla a etale kǐ, “Tayɔɔla ane ne oti bebã fɔtsa akũ” ni, kufe ñnyina anengbã kawe a na.

<sup>VIII</sup> Leme fɔtsã mbla a akũ, tɔkpa na osi tinyina odo kako fɔtsa kpa flee ne yĩ kame. Nte mbla kalaa eláa ni, kufe tɔkpa leme ku.

<sup>IX</sup> Yĩ mɔawe a ndzi tɔ̃ nkpã, kǐ mbla a tána, leme kǐ mbla a ya a, tɔkpa yidza tidzi nkpã,

<sup>X</sup> ade nku a. Ade mbla a kǐ kufe ema yĩ nkpã a, yĩ kɔ̃ wuda ekɔa ema yĩ.

<sup>XI</sup> Tɔkpa tsã mbla akũ tena osi teke yĩ, ade teko yĩ a.

<sup>XII</sup> Foesũ mbla mɔawe a akũ kpale, ade ayea ye nhihie a adã kpĩ, enene leme a.

<sup>XIII</sup> Lokɔa letsa wĩ a kǐ lenene a dani wuda lekpa yĩ? Oowo! Fɔlá lɔmɔ. Tɔkpa tsã tuwĩ akũ tekɔa wuda tema yĩ, ayekĩ taanye te kutitse paa a tetsa. Foesũ fɔtsã mbla akũ benye tɔkpa betsa nde letsa kpa kǐ liti lenéne koũ.

*Kawũkanɔ a Kĩ Kideĩ Ne Oti Kame.*

<sup>XIV</sup> Bunyina kǐ mbla a nye hũhũ kame fɔtsa, leme yĩ kɔ̃ ñnye otidziwa, kǐ benɔ osate bekpa tɔkpa.

<sup>XV</sup> Maánu yĩ fɔtsa kenawa a kayɔ, kitonekĩ maákena letsa a kǐ mawe kǐ makena a, mbom makena letsa a kǐ makesĩ a.

<sup>XVI</sup> Nte letsa a kǐ maáwe a makena kɔ̃ ni, kekɔ̃ ntunɔ kǐ mbla a nene.

<sup>XVII</sup> Foesũ nné yĩ mɔawe akena fɔtsa a, mbom tɔkpa a kǐ tideĩ ne yĩ kame a akena foe.

**XVIII** Ìnyina kī tuwī tidima lidzí ne yī kame ayekī ñnye otidziwa sū. Kitonekī tito kī kawε a kī makena tuwī deī ne yī kame malo ni, maápuli nkena te.

**XIX** Tuwī a kī mawe kī makena a, maákena te, mbom makena tókpa a kī maáwe kī makena a.

**XX** Nte letsa a kī maáwe a makena ni, kekō nné yī mɔawe a akena foe, mbom tókpa a kī tideī ne yī kame a akena foe.

**XXI** Foesū mmó mbla kī fɔletsa ñyi ɔsū, kī nte mawe kī makena tuwī ni, tókpa mbom makena.

**XXII** Ne yī kamekame ni, mamɔ kawɔle ne Baguma mbla a akū.

**XXIII** Leme mamɔ mbla bebã ne yī sukena kame kī yanɔ lema mɔ yī lolɔ kame tuwī kī mawe a. Ekena yī kɔla ɔwane ekpa tókpa mbla a kī edeī ne yī sukena kame.

**XXIV** Nkena oti kī ye akū akɔ kɔnya. Owei aate yī etomena sukena kī sekpã yī sanamena wuda kame a awe?

**XXV** Kole boanye Baguma bɔtsãmena boe ɔlate Yesu Kristo akū.

Finyaa, ayekī nla nye kī ne yī mɔa akū akū ni, nne yī adzuma makena ne Baguma mbla a akū, leme sukena a kó ni, nne masum tókpa mbla a.

## VIII

### *Nkpã Kadzi Ne Baguma Hühü a Onukpě.*

**I** Foesū finyaa kɔtɔkako leláa kekpa bikī bekena ɔmɔa mɔ Kristo Yesu a.

**II** Kitonekī Hühü mbla a kī yakpa oti nkpã ne ɔmɔa kakena kame mɔ Kristo Yesu a, nye yī etomena tókpa mɔ wuda mbla a kame.

III Letsa a kǐ mbla a tápuli ekena a, ayekĩ sukena a te kóbě nẹ ye awẹ sũ ni, Baguma kǒ kena foe. Edo ye mɔawẹ obi eya nẹ otidziwa sukena kǐ sakena tɔkpa kame, ade eyako tɔkpa koto, enye te a.

IV Baguma kena fukĩ ayekĩ boe a kǐ budzi nẹ Hũhũ kame, kǐ nné nẹ sukena kame a, bóapuli budzi nẹ tuwĩ kakena a kǐ ye mbla awẹ a onukpě.

V Bati kǐ bidzi nkpã nde ayekĩ be sukena awẹ a onukpě ni, fotsa a kǐ be sukena awẹ a akũ bakona. Leme bikĩ bidzi nkpã nde ayekĩ Hũhũ a awẹ a onukpě ni, fotsa a kǐ Hũhũ a awẹ a akũ be adzuni ana.

VI Oti kadzi nẹ sukena fowetsa tsẽmɔ wuda, leme oti kǐ Hũhũ a akpã ye a, ana nkpã mɔ lukudo.

VII Nẹ foesũ oti a kǐ ye sukena fowetsa nya ye akũ a adani Baguma okesĩnẹ, kitonekĩ yaákena nẹ Baguma mbla akũ, ade nẹ ɔnɔkɔali kame ni, eláapuli ekena nẹ ye akũ.

VIII Bikĩ bidzi nkpã nẹ be sukena kawẹ onukpě a fɔkelatsa leláapuli fuwo Baguma anẹ.

IX Leme mi kǒ midzĩ nẹ sukena kawẹ onukpě, mbom midzi nde ayekĩ Hũhũ a awẹ kǐ midzĩ a. Odi nye odi kǐ Kristo Hũhũ leláa ye kame lenyé Kristo ode.

X Leme nte Kristo deĩ nẹ nɔ kame a, Hũhũ a nye nkpã ekpa nɔ, kitonekĩ ekena nɔ oti kpĩ nẹ Baguma anẹ, tito kǐ nɔ sukena ayaku malo nẹ tɔkpa sũ.

XI Nte Baguma Hũhũ a kǐ edzela Yesu etomena banɔkpa kame a deĩ nẹ mi kame ni, kekǒ oti a kǐ edzela Kristo etomena banɔkpa kame a leme

aakpa mi sukena kī saku a nkpā, ne ye Hūhū a kī edeī ne mi kame a sū.

**XII** Foesū nwaē ame, budeī adzuma adi kī kenε kī bōkena leme fonyé kī boadzi nkpā ndε ayekī boe sukena awe kī budzi a.

**XIII** Kitonekī nte midzi nkpā ne sukena kawε onukpē ni, míaku. Leme nte mitsā Hūhū kame miko mi fōkelatsa kpa a, míana nkpā.

**XIV** Bati a kī Baguma Hūhū akpā a flee nye Baguma babi.

**XV** Kitonekī Hūhū a kī Baguma kpa mi a tákena mi basate mikavila, mbom Hūhū a akena mi Baguma babi. Ade Hūhū a kobē afō bobōa fowōla kave Baguma kī, “Abba!” kī foe kayo nye kī “Ao Nda!”

**XVI** Baguma Hūhū a mōawe lekēna omōa mō boe hūhū yadi adansie kī Baguma babi bōane.

**XVII** Nte bonye ye babi ni, bonye ye adzapadie leme banyane, ade bomo Kristo bóanya adzapadie a kī Baguma kōa eyi ye a. Foesū nte bōna tsefā ne Kristo lubo kamō a kame ni, bóana tsefā leme ne ye kukūkpale a kame a.

### *Kukūkpale a Kī Kōaya a.*

**XVIII** Makōna kī boláapuli bōkōa lubo a kī bōamo finyaa a bōkonamo Baguma kukūkpale a kī baanye betsa boe a kōlaa.

**XIX** Fōtsa a kī Baguma bōa a flee dzi foadzole mō akū kasī kī Baguma enye ye babi etsa.

**XX** Kitonekī beko fōtsa a kī Baguma bōa a flee koto kī fonye fōtsa pupulidza, nné ne foe kawε akū, mbom Baguma lewe kī fōna lomō. Leme kōnete a deī kī,

XXI luwi lidi ni, fŃtsa a kŃ bębŃa flee aanyę foe akŃ nę tęsate ęsum kŃ yabu kade a kame, fŃyaawo nę akŃ akŃ kadzi mŃ kukŃkpale a kŃ Baguma aakpa ye babi a kame.

XXII KitonekŃ bunyina kŃ keyawo nviã lŃkŃ kŃ a, fŃtsa a kŃ Baguma bŃa a flee abe ayŃlŃhŃ ndę ęmatsŃ kŃ sęmę pi ye aye.

XXIII Lęmę nnę fŃtsa kŃ bębŃa a odi abe ayŃlŃhŃ, mbom boe a kŃ Baguma kpa ye HŃhŃ ndę ye futętsa fŃtonyade a lęmę bŃabe ayŃlŃhŃ nę boe kame, kadzŃle Baguma kŃ ekęna boe ye babi a, ęnyę boe kutitse a flee.

XXIV KitonekŃ ade kŃnęte kŃ sŃ bŃna kate a, lęmę nte bŃamŃ kŃnęte fŃtsa kŃkŃę ni, fubuki fŃnyę kŃnęte. KitonekŃ owe i akŃa anę kate nę fŃtsa a kŃ yamŃ a akŃ?

XXV Lęmę nte boe anę te i nę fŃtsa a kŃ bŃámŃ akŃ ni, bŃana ęwŃle bŃęę kadzŃle foe.

XXVI Ade ayea HŃhŃ a lęmę aayabumŃ boe a kŃ bŃdŃ a, kitonekŃ bunyina ayekŃ kefeta kŃ bŃabŃa mpę bŃkpa Baguma. HŃhŃ mŃawę a abe ayŃlŃhŃ kapili boe lŃlŃ nę Baguma sekę mŃ fŃletsa kŃ onukpę lęlápuli ęle.

XXVII Ade Baguma a kŃ yamŃ bati towŃle kame a nyina letsa a kŃ lenyę HŃhŃ a adzuni, kitonekŃ HŃhŃ a ake Baguma aduli nę ye bade lŃlŃ ndę ayekŃ Baguma awę a.

XXVIII Bunyina kŃ Baguma akęna fŃtsa flee fŃaboomu kakęna fuwŃ kakpa bati a kŃ bawę ye kalę a, kŃ ęve nę ye nhihę onukpę a.

XXIX Bati a kŃ Baguma nyi ęnyamęna lŃtŃ a, ępau be ęyi kŃ beyaakęna ndę ye Obi aye, ayekŃ ye Obi a aanya be ętonyade nę bawę pii kame.



XXX Foesũ bati a kī Baguma nye eyi a, ade be ενε a, ade bikī ενε a, εκενα be bekpola ade ekpa be tsefā ne ye kukūkpale a kame a.

*Yesu Kristo Nye Baguma Ọdọ a Etsa Boe.*

XXXI Nte bọkona fukī flee akū a, litsa bóapuli bọle? Nte Baguma dzẽ ne boe liti a ni, owei aapuli eyidza edza ne boe akū?

XXXII Nte Baguma a kī etásĩ ye mọawe Obi kakọa kakpa, mbom ekọa ye ekpa faa ne boe flee lolọ a ni, nde fọanya kī eláakọa fotsa bebā flee faa ebu Obi ekpa boe?

XXXIII Owei aapuli ebọe fọletsa ne bati a kī Baguma pau a akū? Baguma mọawe di adansie kī betáku koto.

XXXIV Foesũ owei aako be koto? Nné Kristo Yesu a kī eku ìye kī Baguma dzela ye etomena banokpa kame, edzi nkpā ne Baguma sọmọna, yake ye aduli ne boe lolọ a!

XXXV Kekõ owei ìye litsa aapuli etsua bomo Kristo ọdọ a kayite? Lubokamo aapuli, mbọee ọhau, mbọee bati liti katomena, mbọee kolekako ìye ohiã, mbọee ọdzọ kadzi, mbọee wuda libe, mbọee kī wuda?

XXXVI Katsẹle Kpalẹwa a le kī,  
“Nọ sũ, bako boe loko nye loko.

Ade babu boe nde baveli kī bekpā banaako aye.”

XXXVII Ne fukī flee kame a, botsã Kristo kī yawe boe kale a akū bọba ayekī bọkona malo.

XXXVIII Kitonekī nte ndo kī letsama leláapuli lenye boe ne boe Ọlate Kristo ọdọ a kame. Fóláanya wuda ìye nkpā, ode foto banyane ìye hũhũ kpa kobẽ kudi, loko kī ìye loko kī laaya,

XXXIX katinya kī kideĩ ne ode ãye katinya kī kideĩ ne tite kayo ãye fŏtsa a kī beboã a kame fudima. Letsama koũ leláa katinya kame flee kī láapuli lenye boe ne Baguma odo a kī bona bŏtsãmena boe Olate Kristo Yesu akũ a kame!

## IX

### *Baguma Pau Yudafŏ Nde Ye Bati Aye.*

<sup>I</sup> Letsa a kī male a nye onokŏali, Kristo ode mane ade maáma fŏvã a. Yĩ owŏle kī Hũhũ Kpalewa anya ye akũ a akpa yĩ katekado kī nné fŏvã mama.

<sup>II</sup> Mabe ayŏloho, ade nte kalŏe kī kaádo ne yĩ owŏle kame,

<sup>III</sup> kakpa yĩ bati a kī bŏmo be bŏnye sukena mo babŏane moa. Ne be sũ maawe kī Baguma edumu yĩ faa, esẽ bŏmo Kristo kayite malo kufe.

<sup>IV</sup> Kitonekĩ ade be nye Israel omaĩ a kī Baguma pau, ekŏa ekena ye bade, enye ye kukũkpale a etsa be a. Esui onukpẽ mo be, ekpa be ye mbla a lemẽ. Be nne Baguma osum osi wĩ a, ade be lemẽ ekena bohe ekpa a.

<sup>V</sup> Be kasinu to Hebrifo bawanyo a kī bete buĩ a kame, ade be kade kame Kristo lemẽ ne eto nde otidziwa aye eya a. Mifŏ bumu Baguma a kī yanya fŏtsa flee akũ daa daa a! Fŏya lomŏ.

<sup>VI</sup> Nlámŏ kale kī Baguma kalekayi a táya ne foe kame, kitonekĩ nné bati a kī bito Israel a flee nye Israelfŏ kpanunu.

<sup>VII</sup> Ade ayea nné Abraham kasinu babi a flee nye Baguma babi. Baguma bi Abraham kī, “Isak akũ fŏatsã mo aana babi mo bawa a kī nle ãyi a.”

VIII Foe kayo nye kī nné babi a kī Abraham ma nde bati ayea nye Baguma babi, mbom bikī ema ne ye bohe kame a.

IX Kitonekī Baguma bohe a nye, “Kateliva, loko kī kame a, maamuniki ŷya ade Sara aama obinyole a.”

X Nné fukī odi a. Babinyole nviā a kī Rebeka ma a olega nye boe owanyo Isak.

XI-XII Leme ne ayekī babinyole nviā kame omoa kapau foya ne foe kame ne Baguma nhihie onukpē sū ni, Baguma bi Rebeka kī, “Obinokoē a aasum obisēde a.” Ebi ye eyi kōkōe fomō eyama babi a. Foesū Baguma kapau a kī ekena a ledzé ne tuwī ŷye tokpa a kī nta babi a kame odi kena a akū, mbom Baguma kawe foane.

XIII Bele ne Katsēle Kpalewa a kame kī, “Nwe Yakob kale, leme nkesī Esau.”

XIV Lokoa bóale kī Baguma leme lādā kpī? Oowo! Fólá lomō kolaa.

XV Kitonekī ebi Mose kī,  
 “Odi nye odi kī mawe kī makena seme kale nkpa ni,  
 ade ye maakena seme kale nkpa a.  
 Ade odi nye odi kī ye akū kō yī konya ni,  
 maamo ye konya.”

XVI Foesū Baguma oti kapau ledzé ne ye mbodibo ŷye letsa a kī yawe a akū, mbom letsa nye letsa dzē ne Baguma konyakamo odi akū.

XVII Kitonekī ne Katsēle Kpalewa kame a, Baguma bi Egipte legā kī, “Ndzina no legā ayekī maatsā no akū ŷnye yī kobē ntsa, lokoa yī dī legba ne katinya kame flee.”

XVIII Foesũ odi nye odi kĩ Baguma awe kĩ yamŏ kŏnya a, ade ye yamŏ kŏnya a, ade odi nye odi kĩ yawe kĩ ena atŏ ɔsĩ a, yafŏ yana atŏ ɔsĩ.

*Baguma Kalŏkpa Mŏ Kŏnyakamŏ a.*

XIX Mi kame odi aavia yĩ kĩ, “Nte fŏla lomŏ a, nde sũ Baguma buki yanye nfumusu kakpa odi? Owei aapuli eyidza edza ne Baguma kawe akũ?”

XX Nŏ otidziwa, owei ane kĩ akpa Baguma mbuaye lomŏ? Lubui lāvía de ɔmenε kĩ, “Nde sũ ɔme yĩ lomŏ?”

XXI Fubui ɔmenε deĩ osi kĩ yakŏa tIBUTE a kĩ enuna ebŏa lŏbŏ a εme letsa a kĩ yawε. Mbŏεε elá osi kĩ yakŏa tite lŏbŏ mŏape a εme fubui nviã? Yaame lomŏa kĩ lalε kadã eyi ekpa fuwi titiliwu, lŏkŏa ekŏa te nkaε a εme lebebã kĩ laálε kadã eyi ekpa luwi daa akũ adzuma kakena. XXII Ade letsa a kĩ Baguma kena a kayŏ ne awĩ a. Nte Baguma we kĩ yanye ye kalŏkpa kanya, efŏ bεmŏ ye otumi, leme ebuki ena ɔwŏle bŏεε epini bikĩ be akũ ena kalŏkpa, kĩ bidum be bekpa kawŏla a ni, litsa odeĩ kĩ aale?

XXIII Ade nte Baguma we leme kĩ yanye ye kukũkpale baũ a kĩ biko ne boe a kĩ εmŏ konya akũ a, boe a kĩ εmanε eyi ekpa ye kukũkpale a,

XXIV kitonekĩ boe nye bati a kĩ epau etomena Yudafŏ mŏ bikĩ benyé Yudafŏ a kame a ni, odeĩ kadi kale?

XXV Ade fukĩ Baguma le ne Onukpě Őnyene Hosea ovoli kame kĩ,

“Bati kĩ benyé yĩ ɔmaĩ bati a, maave be kĩ, ‘Yĩ bati.’

Kade a kĩ ntáwe ke kale a, maave ke ‘Yĩ ɔdŏ bati.’

XXVI Ne kako mɔape a kī bibi be kī,  
 ‘Minyé yī bati’ a

Ade awā baave be kī ‘Baguma Kī Edzi Nkpā Daa  
 a babi.’ ”

XXVII Baguma Onukpē Ōnyene Yesaya boa  
 fowola ele ne Israelfo akū kī,  
 “Nte Israelfo ne lidede nde mpo abuī dā malo ni,  
 be kame bati sukuloo badi aana kate,

XXVIII kitonekī boe Ōlate aadzemo katinya kame  
 bati pepepepe moatse, etsua letsa nye letsa  
 lukū.”

XXIX Yesaya buki ele eyi kī,

“Nte boe Ōlate Otumifo Flee a statina boe babi  
 mo bawa a badi ni,  
 kufe bodani bokena nde Sodom, buketimo  
 Gomora!”

### *Kale Wī a Nye Israelfo Leme Kade.*

XXX Foesū litsa koū bóale? Matsa kī bikī benyé  
 Israelfo a kī betápili kī badzi kpī ne Baguma  
 ane a, bekena be bati kī bekpola betsāmena be  
 katekado akū.

XXXI Ade Israelfo a kī bekawe mbla a kī yaakena  
 be bati kpī a, tápuli bekena ne mbla a akū a.

XXXII Litsa sū betápuli? Kitonekī betákɔa  
 katekado bewē foe, mbom bekɔa ane bite ne be  
 mɔawe mbodibo akū. Ne foesū bitula ne Kristo  
 kī ela nde de a kī bati atula ne de akū a akū,

XXXIII nde ayekī betsele ne Katsēle Kpalewa a  
 kame kī,

“Midā! Nkɔa de lidi mayi ne Zion,  
 de kī bati aatula ne de akū bene beto.  
 Leme odi nye odi kī ete ye edo ni,  
 konyoā leláawo ye.”

## X

I Nwaë amε, letsa a kī mawε ne yī ɔwɔle kame flee, mo mpae kī mabɔa ne de akū kakpa Baguma nye kī, efɔ̃ yī awe kade bati bena nkpã kate!

II Maapuli ndi adansie kī bekɔa be akū flee bekpa Baguma ɔsum, lemε binyína ayekī basum ye ne osi wī akū a kanyina wī.

III Betányi osi a kī Baguma atsã kabu bati kī bidzi kpī̃ ne ye anε, foesū bewε be moawε tisi kī batsã bekena fɔtsa biwo Baguma anε, ade foesū betákɔa be akū bekpa Baguma osi a kī yatsã kakena bati kpī̃ a.

IV Kitonekī Kristo nye Mose mbla a kawūna, ayekī odi nye odi kī etε ye edo ni, baabu ye oti kpī̃.

### *Baguma Aakpa Odi Nye Odi Nkpã.*

V Mose tsele eyi etsa ayekī oti adzi kpī̃ ne Baguma anε nte edi mbla a akū. Ele kī, “Odi nye odi kī ekena ne mbla a akū pεpεpε ni, yaana nkpã.”

VI Lemε letsa a kī Katselε Kpalεwa a le ne ayekī oti aadã kpī̃ ne katekado kame nye kī, “Tavia nɔ akū kī, ‘Owei aade enaa ode?’ kī fɔatsa kī enaakpã Kristo eto kanɔkpade ede eya.

VII Ìye tavia kī, ‘Owei aaka enaa kayɔ?’ Foe nye kī owei aanaa kanɔkpade enaakpã Kristo eyamεna.”

VIII Letsa a kī yatsa a nye kī, “Baguma kale a fuã nɔ plepλεple, kideĩ ne nɔ onukpẽ mo nɔ ɔwɔle kame.” Ade katekado ɔledo a kī bɔade letsã ne ke akū a ne awī a.

**IX** Nte ọkọa onukpẹ ọle kị Yesu nye boe Ọlate, mo ọte odo ne no ọwọle kame kị Baguma dzela ye etomena banokpa kame ni, Baguma aakpa no nkpā.

**X** Kitonekị ọwọle bakọa kate kado kana kadzi kpī, ade onukpẹ bakọa kanye foe kanya mo Baguma akpa boe nkpā.

**XI** Katsẹle Kpalẹwa a le kị, “Odi nye odi kị ete ye edo leláate konyọá.”

**XII** Odi nye odi deí ne foe kame, kitonekị ntsitsemu adima leláa Yudafo mo bikị benyé Yudafo a kayite. Baguma moape a nye bati flee Ọlate, ade yakpa akū kana fotsa nhila pii bikị babọa mpae kave ye a.

**XIII** Nde ayekị Katsẹle Kpalẹwa a le a, “Odi nye odi kị yaave boe Ọlate a dī ni, yaana nkpā.”

**XIV** Lemẹ nde bati aakena beve oti a kị betáte ye bido a? Nde baakena bete oti a kị betánu ye fọletsa a bido? Ade nte betáde letsá ne fọletsa a akū a, nde baakena binu ye dī?

**XV** Ade nde baakena bide letsá Baguma fọletsa nte betádo fọto banyane? Ade foe akū mo Katsẹle Kpalẹwa a le kị, “Bato a kị beyaade letsá ne Kale Wī a akū a kaya ale kadā paa!”

**XVI** Lemẹ nné bati flee letẹ Kale Wī a, kitonekị Yesaya le kị, “Boe Ọlate, oweí letẹ boe kale a edo?”

**XVII** Foesū katekado ato kale a kanu kame, ade fọletsa a kanu ato letsá kade ne Kristo akū a.

**XVIII** Lemẹ mavía kị onokọali fọane kị betánu Baguma fọletsa a kọlaa? Onokọali binu foe, kitonekị Katsẹle Kpalẹwa a le kị,

“Letsá badene a odo tsena katinya kame flee,

ade be foletsa a gba fonawo katinya  
kawũnakõ a flee.”

**XIX** Mavia bio kĩ lokoa kanu Israelfo a tánu foletsa  
a kayo? Mose moawe lenya loto ele kĩ, Baguma  
le kĩ,

“Maafõ mino lineke mo bati kĩ benyé omaĩ a.

Maakoa omaĩ a kĩ etábinya ane a ndo mi  
kalokpa.”

**XX** Ade Yesaya do owole eba ebi be kĩ, Baguma le  
kĩ,

“Bati a kĩ betáwe yĩ liti osi a, ade be lemó yĩ a  
bati a kĩ betávia yĩ akũ a, ade be ñnye yĩ akũ  
ntsa a.”

**XXI** Baguma buki ele ne Israelfo akũ kĩ,

“Luwi moa flee ndzele yĩ akpo kame nkpa  
bati a kĩ bideĩ ato osĩ,  
kĩ biyidza bedza ne yĩ akũ leme a.”

## XI

### *Baguma Mó Israel Omaĩ a Konya.*

**I** Foesũ mavia kĩ Baguma pu ye moawe bati  
a flefle? Oowo! Yĩ moawe Israelni mane, ñnye  
Abraham kasinu owa, kĩ nto Benyamin katete a  
kame.

**II** Baguma tápu ye omaĩ a kĩ epau eyi kito  
kayokayi a. Mbõee minyina letsa a kĩ betsele  
ne Katsеле Kpalewa a kame, awã a kĩ Eliya ke  
Baguma aduli ne Israelfo lolõ a? Ele kĩ,

**III** “Boe Olate, beko no onukpẽ banyene, ade  
bidzuli no afolibõ tetenye a. Yĩ odi keĩ lite ade  
bawe kĩ bako yĩ malo a!”



IV Leme nde Baguma kpa Eliya mbuaye? Ebi ye kī, “Ntina bati mpim evūkɔnɔ kī betásum Baal baviõ a iyi nkpa yī akū.”

V Ade aye fɔla ne finyaa lɔkɔ kī kame malo a. Israelfɔ sukuloo badi te kī Baguma mɔ be kɔnya epau eyi a.

VI Baguma mɔ be kɔnya, epau be, nné ne be adzuma a kī bekena a sū. Kitonékī nte bati kapau dzē ne be lekɛnana akū ni, kekõ ye kɔnyakamɔ a buki kɔnyé kɔnyakamɔ.

VII Foesū nde? Israelfɔ a tána letsa a kī bekawe a. Leme be kame badi sukuloo a kī Baguma pau a lena foe, ade be nkae kɛna atɔ ɔsī ne Baguma kave akū a.

VIII Nde ayekī Katsɛɛ Kpalɛwa a lɛ kī,  
 “Baguma fõ be adzuni mɔ be towɔɛ dɔ kī baánu fɔletsa kayɔ,  
 Ade kito ne ke keyawo nviã kī a,  
 baápuli bɛmó biyi ɔsū iye binu foe kayɔ.”

IX Ade Dawid lɛ kī,  
 “Baguma efõ be kanyakõ opunu ɛdani kpɛi epi be,  
 mɔ letsa a kī baatula betɔ fɔnya be sɔtɔ kavɛɛ.

X Efõ be anɛ eke ɔtū ayekī beláamɔ fɔkɔ,  
 efõ bikūükū ne be lubokamɔ kayɔ daa daa.”

XI Finyaa mavia kī, kī Yudafo tula bɛnɛ betɔ a, bekahɔ kɔlaa ne awã? Oowo! Ayekī bekɛna tɔkpa sū ni, nkpã katɛ a ya ne bikī bɛnyé Yudafo a sɛkě, ayekī Yudafo a aanɔ be lineke.

XII Nte Yudafo tɔkpa yamɛna akū kana nhila baū ne katinya kame, mɔ nte be hūhū kame kato a ma bikī bɛnyé Yudafo a nhila pii ni, kekõ nhila

a aabluſu paa nte Yudafo a flee dani bekena Baguma bade.

*Bati Kĩ Benyé Yudafo a Malo Na Nkpã Kate.*

**XIII** Ade mi a kĩ minyé Yudafo a mabi foletsá finyaa a. Ayekĩ ñnye bikĩ benyé Yudafo a foto onyane sũ ni, maapia ne adzuma a akũ.

**XIV** Ōsa fóatsã ye kakena kame ni, maapuli nfõ yĩ kade bati lenõ lineke ayekĩ maapuli nte badi nkpã.

**XV** Kitonekĩ kĩ Baguma fone be awe a, ekpola batidziwa kĩ benye ye bakesĩne a ekena be ye bakoba. Foesũ nde fóna nte Baguma buki ete be? Fóna nde nkpã ekpa banokpa!

**XVI** Nte abodoo seke setonyade a kĩ bekõa bekpa Baguma akũ kpale ni, kekõ ye nkae a lemẽ akũ kpale. Ade ayea nte bekõa kutse tunu bebõa afõlie bekpa Baguma ni, koe tenane a lemẽ nye ye tide.

**XVII** Bitsua kugua kutse kĩ bidu a tenane tidi benye, ade bekõa lupõ kame kugua kutsede tenane beyatale ne koe akũ a. Mi a kĩ minyé Yudafo a la nde lupõ kame kutse tenane a kĩ bekõa beyatale ne kukĩ bidu akũ a, ade finyaa míana kutse a tunu kame funitsã a fudi.

**XVIII** Foesũ mitasupa bikĩ bitsua benye nde tenane aye a. Nde sũ miapia akũ mitsa be? Mite ane kĩ tenane keke miane, nné mi nye kutse tunu a, mbom tunu a pini mi.

**XIX** Lemẽ ōsa nõ aale kĩ, “Bitsua tenane a benye kĩ yĩ nna ne te kadokõ.”

XX Fonye onokoali. Bitsua te kitoneki betate bido, ade mina kadzakõ ne mi katekado sũ a, foesũ mitapia ne foe akũ, mbom mikavila.

XXI Kitoneki nte Baguma támõ Yudafo a ki bela nde kutse kpĩ a tenane a konya ni, okona ki yaamõ nõ konya?

XXII Dã ayekĩ Baguma deĩ seme kale, mõ ayekĩ edeĩ osĩ. Baguma deĩ osĩ ne bikĩ bene betõ akũ, leme edeĩ seme kale ekpa nõ nte osila odzi ne ye seme kale a kame. Leme nte otãdzi lomõ ni, Baguma aatsua nõ malo enye ne kutse a akũ.

XXIII Ade nte Yudafo a muniki beyate Baguma bidoi ni, Baguma aakõa be edzela ne be kadzakõ kõe a, kitoneki Baguma aapuli ekena foe.

XXIV Mi a ki minyẽ Yudafo a, mila nde lupo kame kugua kutse tenane a ki bitsua beyatale ne kugua kutse wĩ a akũ a aye. Yudafo a la nde kugua kutse a ki bidu a, foesũ folã osĩ fokpa Baguma ki yaabuki ekõa kugua kutse moawe tenane a ki bitsua benye a etale ne kutse moawe a akũ.

### *Baguma Amõ Bati Flee Konya.*

XXV Nwaẽ ame, onokoali foletsa belawa fudi deĩ ki mawe ki minyi, ayekĩ milãabu mi akũ anyansãfo. Ade foe nye ki Israelfõ badi ato osĩ a aana kenaawo ki, bati a ki benyẽ Yudafo a, kakã flee ya ne Baguma sekẽ.

XXVI Nte foya lomõ fuyua a lokõa Yudafo a flee aana kate, nde ayekĩ Katsela Kpalewa a le ki, "Otene a aato Zion eya.

Yaanye ablo fotsa flee enemena ne Yakob katete a kame a.

XXVII Maakena bohe kīi mo be,  
nte ñnye be tokpa nnamena.”

XXVIII Ne Kale Wī a akū kō ni, Yudafo a dani Baguma bakesīne ne mi a kī minyé Yudafo a sū. Leme ne Baguma be kapau sū ni, benye Baguma bakoba ne be bawanyo sū.

XXIX Kitonekī Baguma lādani ye adzuni ne oti a kī epau ñye ehila a akū.

XXX Kokoε a, mi a kī minyé Yudafo a, mitákena ne Baguma kawε akū, leme finyaa Baguma mo mi konya kitonekī Yudafo a na ato osī.

XXXI Ade ayea konya a kī Baguma mo mi a sū ni, finyaa Yudafo leme lákena ne Baguma kawε akū ayekī Baguma aamo be malo konya.

XXXII Ayekī batidziwa flee sī kī baátse Baguma sū ni, εfō bati flee kena foko katabu kola bawane, ayekī yaamo be flee konya.

### *Fofeta Kī Bumu Baguma.*

XXXIII Baguma akū kana fotsa ne lidede paa!  
Ye nyansā mo kadikanyi kame dzū paa!  
Owei aapuli enye ye kotokako kame?  
Owei aapuli enu ye tisi kayo?

XXXIV Nde ayekī Katsεε Kpalewa a le kī,  
“Owei nyina boe Olate a adzuni?  
Owei aapuli ekpa ye kōde?”

XXXV Owei lekpa Baguma litsedi tō,  
ayekī yaakena ese ye koto?”

XXXVI Kitonekī Baguma leboa fotsa flee,  
ye kobē akū letsa nye letsa dzi nkpā,  
ade ye kame leme letsa nye letsa aawūna a.  
Obu mo kamu nye Baguma fude daa.

Foya lomo.

## XII

*Nkpā Wī Kī Efeta Kadzi Ne Baguma Adzuma Kame.*

<sup>I</sup> Foesū nwaē ame, ayekī Baguma amo boe konya sū ni, make mi aduli paa kī mikɔa mi akū mikpa Baguma nde afolie fotsa kī fudeī nkpā, kī foe akū kpale, fɔawo ye ane. Ade fukīi nye ayekī miasum Baguma ne ɔnokɔali kame mo mi towole a.

<sup>II</sup> Mitadzi nkpā nde ayekī katinya kīi kame bati adzi ne tokpa kakena kame a, mbom mifō Baguma edani mi adzuni ekena avōē lokɔa midani obla. Fɔafō minyi Baguma kawe, fotsa a kī fonene, kī fɔawo ye ane, fɔkpola leme a.

<sup>III</sup> Ne Baguma konyakamo futetsa baū a kī ekpa yī sū ni, mabi mi kame odi nye odi kī etabu ye tonokōē eba ayekī kefeta. Ne foe kadokō a, ekona fotsa a kī fotsa akū kadola, lokɔa edzemo ye akū edā ne katekado a kī Baguma kpa ye a onukpē.

<sup>IV</sup> Ayekī budeī sukena foko kumekume pii ne oti moawe a kame, kī fɔakena tudzuma futefute a,

<sup>V</sup> ade ayea tito kī bati pii boane malo ni, oti moa boane ne Kristo kame, kī botsamo akū nde sukena foko futefute ne oti moa kame.

<sup>VI</sup> Baguma mo boe konya, ekpa boe futetsa futefute, foesū mifō bokena foe akū adzuma ne ye konyakamo a onukpē. Nte boe futetsa nye Baguma folets a onukpē kanye ni, kene kī boakena ne katekado a kī budeī a onukpē.

<sup>VII</sup> Nte boe futetsa nye kī busum bati ni, kene kī busum be ayekī kefeta, nte futetsa nye fotsa katsa ni, kene kī botsa fotsa.

**VIII** Nte fonye bati owole kobẽ kado ni, kene kĩ bokena foe. Odi nye odi kĩ yakpa bati fotsa ni, ekena foe mo owole faa. Odi nye odi kĩ edzẽ ne bati onukpẽ ni, kene kĩ ekena adzuma mo osĩ, ade odi nye odi kĩ yakena seme kale kakena ni, kene kĩ ekena foe mo ane kakpale.

**IX** Miwe akũ kale ne onokoli kame. Mikesĩ tokpa, lokoa mipi fotsa wĩ midomo akũ.

**X** Miwe akũ akũ kale nde bawã ne Kristo kame aye, ade odi nye odi ebã mbodi ekã obu ekpa owaẽ a.

**XI** Mikena adzuma mo osĩ ade mitana onyone a. Misum boe Olate a mo owole kame kobẽ.

**XII** Mifõ mi konete a kokpã mi ne kawole kame. Mina owole boe ne mi ohau kame, mikaabã mpae daa daa.

**XIII** Mibumo asoli bati a kĩ badi ahiã a, ade mite banonõ faa ne mi toto kame a.

**XIV** Miwã Baguma kĩ ehila bikĩ bitomo mi liti a. Mivia kĩ ehila be, etadum be.

**XV** Mimõ kawole mo bikĩ bamõ kawole, ade mibe mo bikĩ babe leme a.

**XVI** Mina ne adzuni moape kame mikpa odi nye odi. Mitapia akũ, mbom mikena tokoba mo bikĩ bedola be akũ kĩ bati labu ne letsama kame a. Mitabu mi akũ kĩ minyina kadi.

**XVII** Nte oti odi fum no ni, takoa tokpa ose ye koto. Mibã mbodi mikena letsã kĩ odi nye odi abu kĩ lenene a.

**XVIII** Nte fõale kakena, mo fõato mi sekẽ ni, mimõ odi nye odi midzi ne lukudo kame.

**XIX** Nwaẽ ame, mitakena odima tokpa mise koto da, mbom mifõ Baguma kalokpa kekena foe.

Kitonekĩ Katsɛle Kpalewa a le kī, ɔlate a le kī,  
 “Yī aavele soto, yī aakena nse koto.”

XX Leme Katsɛle Kpalewa a le kī,

“Nte kole ako no okesine ni, kpa ye funitsa enya.  
 Nte omɔado ako ye ni, kpa ye mui emɔa.

Kitonekĩ nte okena fukii ni, aafɔ konyoã liwo ye  
 paa.”

XXI Tafɔ tokpa lenya no akũ, mbom kɔa tuwĩ  
 kanya tokpa akũ.

## XIII

### *Mikɔa Obu Mikpa ɔmaĩ Akũ Banyane.*

I Kene kī odi nye odi ebu ɔmaĩ akũ banyane,  
 kitonekĩ otumi odima lelãa kī etãto Baguma  
 sekẽ, ade ɔmaĩ akũ banyane a kī bidzi finyaa a,  
 Baguma lidzina be.

II Foesũ odi nye odi kī eyidza edza ne ɔmaĩ akũ  
 banyane otumi akũ a, yidza edza ne letsa a kī  
 ehihie eyi a akũ. Ade odi nye odi kī yakena lomɔ  
 a, aavele kotokaku ekpa ye mɔawɛ.

III Bati a kī bakena tuwĩ a, lãvila bati akũ  
 banyane, mbom bikĩ bakena tokpa a avila be.  
 ɔwe kī bati akũ onyane etahũnahũna no? Kekɔ  
 kena letsa a kī lenene, lokɔa yaamu no.

IV Kitonekĩ bati akũ onyane a nye Baguma  
 ɔsumune kī yakena adzuma ekpa no kale. Leme  
 nte okena tokpa kɔ ni, kekɔ vila ye, kitonekĩ edeĩ  
 kobẽ kī yavele soto nde ayekĩ kefeta. Baguma  
 foto onyane yane, ade yadã kī bekpa bikĩ bekena  
 tokpa a Baguma soto kavele a.

<sup>V</sup> Ne fukĩ sũ ni, kene kĩ oti adola akũ ekpa omaĩ akũ banyane a, nné ne Baguma soto kavele odi sũ, mbom ayekĩ oti owole fõ enyina tuwĩ a sũ.

<sup>VI</sup> Ade fukĩĩ leme sũ miase omaĩ togole a, kitonekĩ omaĩ akũ banyane a akena adzuma kakpa Baguma nte bekena be tudzuma tekpola.

<sup>VII</sup> Foesũ mise be letsa a kĩ midzimõ be a. Mise ogole mõ dute mikpa bikĩ kefeta. Mivila oti a kĩ kene kĩ bivila a, ade mibu oti a kĩ kene kĩ bekpa obu a.

### *Ayekĩ Boadzi Mõ Akũ Akũ.*

<sup>VIII</sup> Mitadzimõ odima koto, koto a kĩ miadzimena a nye kĩ miwe mi akũ akũ kale. Odi nye odi kĩ ewe owaẽ kale ni, ekena ne Baguma mbla a flee akũ.

<sup>IX</sup> Mbla a kĩ Baguma kpa a le kĩ, “Tabõa adõpaa, tako oti, taye, tayõle ane ne nõ okõba fõtsa akũ,” mõ tebẽbã a kĩ tibu a flee boomu ne mbla mõape kame kĩ, “We nõ okõba kale nde ayekĩ awe nõ akũ kale a.”

<sup>X</sup> Nte awe odi kale ni, oláakena tokpa ne ye akũ, foesũ odo nye mbla a flee akũ kakena.

<sup>XI</sup> Kene kĩ miakena fukĩĩ, kitonekĩ minyina kĩ loko wo oto kĩ mianyinya ne tida kame. Kitonekĩ loko a kĩ Baguma aate boe a nkpã fuã finyaa leba loko a kĩ bõnya loto bõte Kristo budo a.

<sup>XII</sup> Lenye loko tẽ liyua, kade lamena kanyina. Mifõ bõfõ otũ kame fõtsa kakena, lokoõ bõbõe kawũ kanõ fõtsa bõbla bõkpa kanõ ne ohaĩ kame.

<sup>XIII</sup> Mifõ bupi boe akũ kapi wĩ nde bati kĩ bidzi ne ohaĩ kame. Mitafõ bõna ne kanya mõ futo kawole mõ bave kawuga kame, ãye adõpaa



kaboa, ãye ablo kadi, ãye kapaa mo anengbã kakena kame.

<sup>XIV</sup> Mbom mibœe boe ɔlate Yesu Kristo kawũ fotsa mido nde atadie aye, lokoa mifõ mi sukena akũ kadã kakona miyaadani se odo fotsa akũ bakenane.

## XIV

### *Mitadzemo Mo Mi Bakoba Kristofõ.*

<sup>I</sup> Mite oti a kã etátim ne katekado kame a mido ne mi kame faa, mitavele foletsã mo ye ne letsã kã kene kã ekena mo likã ketáfeta kã ekena a akũ.

<sup>II</sup> Oti odi katekado kpa ye osi kã enya funitsã fudi nye fufudi, leme oti a kã ye katekado tátim a kõ anya koba kame funitsã odi.

<sup>III</sup> Oti a kã yanya letsã nye letsã a, etasupa oti a kã yaánya foe. Ade oti a kã yanya koba funitsã odi a, etadzemo ekã yanya letsã nye letsã, kitonekã Baguma te ye.

<sup>IV</sup> Owei ane kã adzemo oti bebã osumune? Ye moawe ɔlate aamo nte edzẽ pintii ãye eto. Leme yaanya akũ kitonekã boe ɔlate a aapuli ekena ye edza pintii.

<sup>V</sup> Oti odi abu kã luwi lidi sã leba fuwi bebã a, ade odi leme adã kã fuwi a flee keti a. Ne fukũ odu akũ a, odi nye odi edza pintii ne kako moa.

<sup>VI</sup> Odi nye odi kã ebu luwi lidi paa ni, ekena foe kã yado boe ɔlate a obu. Ade ayea odi nye odi kã yaánya funitsã fudi a, kena foe kã yado boe ɔlate a obu, ade yanye Baguma kole ne foe akũ a.

<sup>VII</sup> Boe kame odima lidzĩ nkpã ekpa ye akũ odi, ade boe kame odima láku leme kakpa ye akũ odi a.

VIII Nte budzi nkpã ni, boe Ɔlate a budzi bɔkpa, ade nte buku a, boe Ɔlate a buku bɔkpa. Foesũ nte budzi nkpã o-o ãye buku o-o, boe Ɔlate a bade bɔane.

IX Ade fukĩ sũ mɔ Kristo ku, ade eyidza edzi nkpã ayekĩ yaanya bikĩ bidzi nkpã mɔ bikĩ biku a Ɔlate a.

X Ade nɔ kɔ̃, nde sũ ako awaẽ kɔto? ãye nɔ malo nde sũ asupa awaẽ? Boe a flee bɔadza ne Baguma ane kame lokɔa edzemɔ boe.

XI Kitonekĩ betsele ne Katsela Kpalewa a kame kĩ,

“Ɔlate a le kĩ, ‘Kĩ ndzi nkpã kĩ a,  
odi nye odi aake aduli ekpa yĩ,  
ade odi nye odi aabinya onukpẽ ele kĩ  
yĩ nye Baguma a.’ ”

XII Foesũ boe kame odi nye odi aakpa Baguma ye mɔawe akũ akunta.

### *Tafɔ̃ Awaẽ Okristoni Lekena Tɔkpa.*

XIII Foesũ mifɔ̃ bɔfɔ̃ akũ akũ kadmema, kako kɔto. Fukĩ miakena nye kĩ mikena adzuma kĩ miláakena letsama kĩ fɔafɔ̃ awaẽ leto ãye fɔfɔ̃ ekena tɔkpa.

XIV Yĩ ɔmɔa kakena mɔ boe Ɔlate Yesu sũ, nte ndo kĩ funitsã fudima ne foe akũ akũ lenyé efĩ fɔtsa. Leme nte odi te edo kĩ funitsã fudi akũ tákpale ni, kekɔ fɔkɛna efĩ fɔtsa fɔkpa ye.

XV Nte nɔ funitsã kĩ anya sũ awaẽ te kalɔe ni, kekɔ nné ɔdo kame ɔtsẽmɔ ye. Tafɔ̃ funitsã a kĩ anya a lewɔla oti a kĩ ye lolɔ Kristo ku a.

XVI Foesũ mitafɔ̃ bati bebã lisupa fɔtsa a kĩ mi miakona kĩ fɔnɛɛ a.

**XVII** Kitonekĩ Baguma legākanya a lenyé kanya mo kamoa, mbom fonye tuwĩ kakena mo lukudo, mo kawole kĩ Hũhũ Kpalewa a akpa a.

**XVIII** Ade nte odi asum Kristo ne osi kũ akũ a, yawo Baguma ane ade bati leme akpa ye obu a.

**XIX** Foesũ mifõ boe botae enya kĩ boakena letsa a kĩ layamena lukudo, titiliwu mo fukĩ fõabumena akũ akũ.

**XX** Mitabula Baguma adzuma kade ne funitsã sũ. Ne onokoali kame ni, funitsã flee akũ kpale fokpa kanya, leme fonéne kĩ banya letsa kĩ laha odi fõfõ ekena tokpa.

**XXI** Letsa wĩde nye kĩ taba sekena ñye omoa waĩ ñye akena letsa bebã lidima kĩ fõafõ awaẽ lekena tokpa.

**XXII** Fõ letsa a kĩ ote odo ne fõtsa kũ akũ a, fona ne mimo no Baguma odi kayite. Baguma hila oti a kĩ etáko ye akũ koto ne letsa a kĩ ekena, emo kĩ lenene a sũ.

**XXIII** Leme nte odi anya letsa kĩ ye owole tákpa ye osi a, Baguma ako ye koto, kitonekĩ letsa a kĩ ekena a táto katekado kame. Letsa nye letsa kĩ oti akena kĩ fotáto katekado kame ni, tokpa tane.

## XV

*Mifõ Bakena Letsa a Kĩ Laawo Bati Bebã Mbom Ane.*

<sup>1</sup> Kene kĩ boe a kĩ budeĩ osĩ ne katekado kame a, boabumo bati a kĩ be katekado lelá osĩ a ne be ohau kame. Ketáne kĩ boakena letsa a kĩ laawo boe moawe ane.

II Mifõ boe kame odi nye odi ekena letsa a kī laawo boe bakoba ane ayekī fõale fõkpa be, bitim ne be katekado kame.

III Kitonekī Kristo malo tákena fõtsa a kī fuwo ye ane, mbom nde ayekī betsele ne Katsela Kpalawa a kame kī, Kristo bi Baguma kī, “Fuvūnatsa a kī beta bekpa nɔ a, yako ne yī akū.”

IV Ade letsa nye letsa a kī betsele biyi ne Katsela Kpalawa a kame a, betsele foe batsa boe fõtsa, kī bokoa owole boee mo Baguma fõletsa bodza pintii, budo owole bona letsa a kī boadã ane a.

V Baguma a kī ye nye owole boee mo kobẽ kado katokõ a, efõ mina onukpẽ moa ne mi kame, mitomo Kristo Yesu osi a kī etsa a,

VI ayekī mi flee miakoa owole moa mo odo moa mimu Baguma, kī enye boe Jlate Yesu Kristo Jlega a.

*Paulo Koa Kale Wī a Ema Bikī Benyé Yudafõ a Lemε.*

VII Foesū mite mi bawaẽ nde ayekī Kristo te mi a, fõnya obu fõkpa Baguma.

VIII Mabi mi kī Kristo yakena Yudafõ a osumune, ekoa etsa kī Baguma adi onokoli, lokoa ete de ne bohe a kī Baguma kena mo Yudafõ bawanyo a akū,

IX ayekī bikī benyé Yudafõ a lemε aamu Baguma ne ye konyakamo sū. Nde ayekī Katsela Kpalawa a le kī,

“Ne foesū maamu nɔ ne bikī benyé Yudafõ a kame.

Maasã kamu tonɔ ndela nɔ dĩ ne ode.”

X Ade bibuki betsele biyi kī,

“Mi a kī minyé Yudafõ a,

mimo kawọle mọ Baguma bade a.”

XI Katsẹle bebã le kī,

“Mi a kī minyẹ Yudafo a flee mimu boe Ọlate a.  
Mi fude fude flee mimu ye!”

XII Ade Yesaya lemẹ le kī,

“Isai kasinu a kame obi odi aane eta,  
ye aayanya bikī benyẹ Yudafo a akū.

Ade ye akū baakọa ane bite a.”

XIII Baguma a kī ye akū boate ane a efọ kawọle mọ lukudọ letẹ mi kame ne mi ye katekado sū, ayekī mi kọnete a aakabo ane ne Hūhū Kpalẹwa kọbẹ a kame.

*Paulo Nye Letsa a Sū Kī Etsẹle Fọletsa Kī a Kayọ.*

XIV Nwaẹ ame, yī mọawe a nte ndo paa kī fọtsa wī kakena te mi kamekame, ade minyina kadi pii kī miapuli mide akū akū.

XV Lemẹ ne ovoli kī kame a, ndo ọwọle ntsele fọtsa fudi faa kī mabuki nkọa nkai mi foe. Ndo ọwọle kitonekī Baguma mọ yī kọnya ekọa adzuma kī edo yī ne awe,

XVI kī ĩnya Kristo Yesu ọsumune nkena adzuma nkpa bikī benyẹ Yudafo a. Nkena adzuma nde ọsofo nkale Baguma Kale Wī a, ayekī bikī benyẹ Yudafo a aakena nde afolibọ wī kī Hūhū Kpalẹwa kpale ye akū ekpa Baguma.

XVII Foesū yī ọmọa kakena mọ Yesu Kristo sū ni, maapuli mpia ne adzuma a kī nkena nkpa Baguma a akū.

XVIII Letsa a kī odi maado ọwọle nle nye kī Kristo tsã yī akū efọ bikī benyẹ Yudafo na osetie

ne Baguma foletsa akũ. Ekena fukĩ etsãmena yĩ foletsa a kĩ nle, mo adzuma a kĩ nkena a kame.

**XIX** Fukĩ ya ne foe kame ne awāwā mo nsentseleni fotsa a kĩ nkena, ne Hũhũ Kpalewa a kɔbē a kame. Foesũ ntsā mmini nto Yerusalem nnawo Iliriko tite akũ a, nde letsā ne Kristo Kale Wĩ a akũ ntsena temato a flee.

**XX** Yĩ kawē mo osĩ nye kĩ made letsā ne Kale Wĩ a akũ ne awā kĩ bati tánu tō Kristo dī, ayekĩ nlánake nte ne litekũ kĩ odi nya loto eke a akũ.

**XXI** Nde ayekĩ Katsēle Kpalewa a le kĩ,  
 “Bati a kĩ betábi be kadima ne ye akũ tō a, aamo ye,  
 ade bikĩ betánu tō kadima ne ye akũ a, aanu foe kayo.”

*Paulo Kawē Kĩ Yanaa Roma.*

**XXII** Ade foesũ nkawē loko pii kĩ maya ne mi sekē, mo ntána osi a.

**XXIII** Lemē finyaa kĩ iyua yĩ adzuma ne fuyite kĩ, mo ayekĩ nkawē futeli pii kĩ mayaasela mi a sũ ni,

**XXIV** mate kado kĩ maapuli nkena foe finyaa. Mawe kĩ nte iyaatē nnaa Spania, maadza ne mi sekē sukuloo budo akũ kawole, loko mibumena minye yĩ osi nnaa.

**XXV** Finyaa kō ni, manaa Yerusalem nkoa futelitsa fudi mma Baguma bade a ne awā.

**XXVI** Kitonekĩ Makedonia mo Akaia tesoli a te fotsa faa kĩ bakoa bibumena ahiāfo a kĩ bideĩ ne Baguma bade a kame ne Yerusalem.

**XXVII** Be moawe a adzuni foane, lemē ne onokwali kame ni, be adzuma foane kĩ bibumo be. Kitonekĩ nte bikĩ benyé Yudafo a na tsefā

ne Yudafō hūhū nhila fōtsa a kame ni, kene kī bikī benyé Yudafō a leme akōa be akū kana fōtsa bibumena Yudafō a.

**XXVIII** Foesū nte nkena adzuma kī ĩyua, mō nkōa fōtsa a kī bite a nkpa be ni, maatsā mi sekē ntē nnaa Spania.

**XXIX** Īnyina kī nte maya ne mi sekē ni, maakōa Kristo Kale Wī kame nhila baū mma mi.

**XXX** Nwaē ame, nneε boe Ōlate Yesu Kristo mō Hūhū Kpalēwa a ōdō kī yakpa a, make mi aduli kī mikena ōmōa mō yī bōbōa mpae mō ōsī bōkpa Baguma ne yī lōlō.

**XXXI** Mibōa mpae kī enye yī etomena bati a kī betáte bido ne Yudea a awe. Mibōa mpae leme kī yī kasum a kī manaakena ne Yerusalem a kiwo Baguma bade a anε.

**XXXII** Nte fōnye Baguma kawε ni, maaya ne mi sekē mō kawōle ĩyaadzi nweya.

**XXXIII** Baguma kī yakpa lukudō a, enamō mi flee. Fōya lōmō.

## XVI

*Paulo Kōa Kawōna Emena Bate Badone Ne Roma a.*

**I** Mawε kī mabōa boe ōwaētsole Foibe kī enye ōsumune paa ne Kenkrea asōli a kame dī ntsa mi.

**II** Mite ye ne boe Ōlate a dī akū nde ayekī fōfeta Baguma bade a aye. Mikpa ye kabumena kadi nye kadi kī yaasī etomena mi sekē, kitonekī enye bati pii mō yī mōawe malo obumenane.

**III** Mawōna Priskila mō Akwila kī benye yī bakōba adzuma bakenane ne Yesu Kristo adzuma kame.

IV Bekoa be nkpā bewāne yī lolō. Nné yī odi anye be kōle, mbom mō tesoli a kī tideī ne bikī benyé Yudafo kame a lemε.

V Mawōna asoli bati a kī batsena ne be toto kame a lemε. Mawōna yī owene Epaineto kī enya oti otonyade kī ete Kristo edo ne Asia amantam a kame.

VI Mawōna Maria kī ekena adzuma mō osī ekpa mi a.

VII Mawōna Androniko mō Yunia, yī akū bati, kī bōmō be bōwa kōla a. Betε dī ne foto banyane a kame, ade benya yī lotō ne Kristo kate kado kame a.

VIII Mawōna Ampila kī mawe kale paa, kī edeī ne omōa kakena kame mō boe Olate a.

IX Mawōna Urbana lemε, boe okōba ne Kristo adzuma a kame, mō yī okōba paa Staki.

X Mawōna Apele kī bemó kī etim ne Kristo kame a. Mawōna Aristobulo toto kame bati a flee.

XI Mawōna yī kade oti Herodion mō Narkiso toto kame bati a kī bekena omōa mō Kristo a.

XII Mawōna Trifaina mō Trifosa kī bakena boe Olate a adzuma a, mō yī owene Persi kī ekena adzuma paa ekpa boe Olate a.

XIII Mawōna Rufo kī etε dī ne boe Olate adzuma kame a, mō oma kī epi yī ndε obi aye a.

XIV Mawōna Asinkrito, Flegon, Herme, Patroba, Herma mō be bawaε a kī bideī ne be sekε a.

XV Mawōna Filologo, Yulia, Nerea mō ye owaεtsole, mō Olipa mō Baguma bade a kī bideī ne be sekε a.

XVI Miwōna akū mikena atuu ne Kristo odo kame. Kristo tesoli bati a flee awōna mi!



*Paulo De Bate Badone Ne Roma a.*

<sup>XVII</sup> Nwaë amé, make mi aduli kī mifō mi ané ena né bati a kī bayaména kasé, kakkpā badi bayela be katekado a akū. Mivele akū né be akū!

<sup>XVIII</sup> Kitonekī bati a kī bakéna fukīnaa bame odu a lásun Kristo, boe Ɔlate a, mbom be mɔawé lupu basum. Bakoa sémé menemene mɔ fovā foletsa kamu bati, ade bake bati a kī binyína tɔkpa a adzuni a.

<sup>XIX</sup> Lemé mi kō odi nye odi nu ayekī miayi atɔ katse Kale Wī a, né foesū kawole ade yī paa né mi akū. Letsa a kī mawe nye kī minyi kadi né letsa wī kakéna kame, lemé né tɔkpa kakéna kame kō ni, minya bati kpī.

<sup>XX</sup> Owi leláabuna, Baguma a kī yakpa lukudo a, aabubuli Satana kpetekpetekpete né mi aboa kayɔ. Boe Ɔlate Yesu Kristo emɔ mi kɔnya.

<sup>XXI</sup> Timoteo yī adzuma kame ɔkɔba awōna mi flee. Ade aye a Lukio lemé, mɔ Yason mɔ Sosipatro kī benye yī kade bati awōna mi a.

<sup>XXII</sup> Yī Tertio, kī ntsele ovoli kī nkpa Paulo a, lemé mawōna mi né boe Ɔlate a dī akū.

<sup>XXIII</sup> Yī tɔtɔ ɔlate Gaio, kī ye awā bate badone a atsena a, awōna mi.

Ade Erasto kī enye ɔmato kī sika ɔkolane mɔ boe ɔwaényole Kwarto awōna mi papaapa.

<sup>XXIV</sup> Boe Ɔlate Yesu Kristo emɔ mi flee kɔnya. Fɔya lomo.

*Paulo Mu Baguma.*

<sup>XXV</sup> Mifō bumu Baguma. Yaapuli edo mi katekado kɔbē né ayekī efō nde letsā Kale Wī a né Yesu Kristo akū a, mɔ ayekī enye ɔnokɔali foletsa belawa a kito ané kɔkɔkɔe a etsa sū.

XXVI Leme finyaa, benye onokoali a na betsa fude flee betsamaena Baguma onukpẽ banyene foletsa katsela kayi a kame, nde ayekĩ Baguma kĩ edzi nkpã daa hihie eyi a, ayekĩ bati flee aate bido, bekena ne ye oledo a akũ.

XXVII Baguma a kĩ ye moape nye onyansani a, boakpa kamu botsamaena Yesu Kristo akũ kanaa daa daa. Foya lomo.

**Baguma Apam Vɔɛ a Tɔwuli**  
**Tɔwuli: Baguma Apam Vɔɛ a Tɔwuli New Testament**  
copyright © 2008 Wycliffe Bible Translators, Inc.

Language: (Tɔwuli)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 28 Dec 2024 from source  
files dated 29 Jan 2022

68df0193-2981-5275-8994-8f743fe01e5e